

**Tun M banyak rancangan bantu orang Melayu tapi tak sempat laksana**  
**SINAR HARIAN**  
**16 MEI 2022**  
**NURUL HIDAYAH HAMID**

ALOR SETAR - Bekas Perdana Menteri, Tun Dr Mahathir Mohamad mendedahkan beliau memiliki banyak pelan untuk membantu orang Melayu ketika menjawat jawatan itu kali kedua.

Ahli Parlimen Langkawi itu berkata, kemiskinan merupakan antara masalah dilalui orang Melayu dan dia mengetahui cara untuk mengatasi masalah itu.

Tambah beliau, rancangan juga telah diatur untuk mengatasi masalah kemiskinan kampung-kampung seumpamanya.

“Bagaimanapun, belum sempat kita dapat lancar perancangan berkenaan, saya telah dibuang dan ditolak jatuh dari jawatan.

“Mereka lebih utamakan nak jadi Perdana Menteri daripada selesaikan masalah orang Melayu,” katanya kepada pemberita selepas Majlis Jamuan Hari Raya Parlimen Langkawi di Dataran Telaga Walk, Pantai Chenang di sini, pada Isnin.

Tambah Dr Mahathir, beliau sentiasa mencari jalan untuk mengurangkan kemiskinan dalam kalangan orang Melayu.

“Ini kerana selagi mereka miskin, mereka akan hadapi masalah, dan ia akan menyebabkan keadaan menjadi tidak stabil,” katanya.

Dr Mahathir berkata demikian ketika diminta mengulas pelawaan Ketua Penerangan UMNO Selangor, Isham Jalil untuk mengadakan sesi wacana bersama dirinya.

Mengenai pelawaan Isham itu, Dr Mahathir memaklumkan, ada acara lain untuk membangkitkan isu-isu lain dalam negara.

“Tak semestinya dengan ada wacana seperti ini dan ada tujuan tertentu untuk ada perjumpaan yang macam itu,” katanya.

Dalam pada itu, Dr Mahathir membidas kenyataan Datuk Seri Najib Tun Razak kononnya ‘cash is king’, ‘king’ itu adalah rakyat.

Menurutnya, kenyataan dikeluarkan Najib merupakan satu pembohongan kerana dakwanya Ahli Parlimen Pekan itu kerap berbohong termasuklah dalam Parlimen.

“Saya hairan kenapa Najib diberi tempat untuk bercakap bohong. Macam tidak siuman (cara cakap). Kononnya cash is king, king itu rakyat. Jadi, bila kita jumpa rakyat, kita (kena panggil) Duli Yang Maha Mulia Rakyat. Tak kan macam itu. Itu cakap bohong,” katanya.

**© 2018 All Rights Reserved •Karangkraf Group Media • © 2018 HakciptaTerpelihara • Kumpulan Media Karangkraf**

Source: <https://www.sinarharian.com.my/article/202554/BERITA/Nasional/Tun-M-banyak-rancangan-bantu-orang-Melayu-tapi-tak-sempat-laksana>